

I UVOD

U diplomskom radu analiziraću pojam notara, notarijalnog prava, kao i istorijski razvoj latinskog notarijata.

Posebnu pažnju ću obratiti na istorijski razvoj latinskog notarijata od samih početaka, preko Grčke, Rima, Vizantije, srednjovjekovne Dalmacije, Srbije, Franačke države, Italije, Francuske, Njemačke, Engleske i Krljevine Jugoslavije, jer su u tom istorijskom periodu postavljeni temelji razvoja notarijata i vremenom su se razvili određeni elementi, koji su doveli do stvaranja institucije latinskog notarijata kakvu poznajemo danas.

U radu ću obraditi i savremeni notarijat, kao i oblike bilježništva koji su se razvili u pojedinim dijelovima Evrope, Engleske i Sjedinjenih Američkih Država.

Dio rada ću posvetiti i temi harmonizacije notarskog prava, koja je aktuelna obzirom na današnje evropske procese.

Fokusiraću se na notarijat u Bosni i Hercegovini, kao i tendencije daljeg razvoj ove institucije u našoj državi.

Notar obavlja djelatnost koja podrazumjeva posebno povjerenje.

Činjenica da isprava koju je sastavio ili ovjerio notar ima snagu javne isprave, da njegova potvrda o identitetu ili životu stranke ima snagu dokaza u javnom, pravnom saobraćaju, da je on ovlašćen i dužan da čuva isprave i hartije od vrijednosti ili novac, znači da notar za stranku obavlja djelatnost od posebnog javnog povjerenja. Ali, činjenica da isprava koju je sastavio notar ima karakter javne isprave, da je on ovlašćen potvrđuje istinitost određenih činjenica, znači da se njegova djelatnost, odnosno rezultat te djelatnosti pojavljuje kao djelatnost od posebnog povjerenja i za treća lica. I po tome je notar bitno različit od advokata, koji stoji uz stranku, ali i suda ili upravnog organa koji stoji nasuprot stranke ili neutralno naspram dve stranke u sporu. Notarska djelatnost uživa posebno povjerenje i od velikog je značaja za sigurnost pravnog prometa, pored ostalog mora biti od uticaja na uslove koje kandidat treba da ispunjava da bi mu bila povjerena kao i posebnu odgovornost notara.

Cilj diplomskog rada je da ukažem na istorijski razvoj bilježništva, koji je postavio temelje i put razvoja današnjeg modernog latinskog notarijata.

Posebnu pažnju ću posvetiti stilu pisanja i trudiću se da kratkim, jasnim i preciznim rečenicama pružim kvalitetan odgovor na temu mog rada.